

吾

學

編

建文遜國臣記第六卷

吾學編第五十七

海鹽鄭曉

某部郎中梁田玉

梁田玉定海人歷官至郎中靖難兵入金陵田玉與葉御史俱髡髮爲僧避去久之松陽人王詔遊治平寺觀轉藏聞藏上嚙嚙有聲異之令人緣藏登絕頂無所見見書一卷載建文時出亡臣僚二十餘人事紙毀泐字多斷爛不可讀讀數日稍稍銓錄其可識者得田玉郭良梁中節梁良用宋和郭節何洲梁良玉何申凡九人人僅數言詔憐其

忠又得之異各贊數語題曰忠賢奇秘錄贊良玉
曰行儒名釋知我者誰至寶淪沒久而同輝

中書舍人梁良玉

梁良玉亦中書舍人梁郎中族也靖難後訣妻子
易姓名挾微貲走出金陵城逾嶺至海南寓市肆
粥書爲業以死贊曰忠臣蹇蹇遵彼海潯耽書玩
市資以盡簪屯如邅如哀此陸沉

中書舍人何申

何申不知何許人爲中書舍人建文末奉使四川
至峽口聞金川門不守發憤慟哭吐血不數日疽

發背死贊曰兩涯洶洶中作霹靂義氣馮殷與之
俱激奸諛過此寧不惕息余乃爲櫟括王子之詞
合而銘之曰今吾故吾知我者誰潛若溱身希蹤
采薇戢戢潛龍寥寥冥鶴豈吝姬疇而甘漢卜山
椒水滋天涯海潯會其可逢鼓以南音肯欠一死
以明我心白霓晝見虞淵沉沉孰呵護此悠悠古
今嗟乎靖難時死者無慮千人宋張林黃諸君子
百方搜考僅得百餘人此二十餘人者幸而不死
又得好義者密錄其姓名藏之蕭寺秘處歷百餘
年而王詔始見之縉雲鄭僖爲識其事竟以紙字

磨滅故僅得九人其十一人不可考矣

中書舍人宋和 中書舍人郭節

宋和郭節皆中書舍人也不知何許人靖難後變名挾卜筮書走異域賣卜給衣食客死

梁良用

梁良用亦定海人父子兄弟八人同仕于朝靖難後相率變姓名避去良用去爲舟師已而死于水或曰梁氏父子兄弟爲舟師投水死者五人贊曰泛泛栢舟載浮載沉中流誓楫懷我好音肯欠一死匪名是尋以完我族庶明我心

梁中節

梁中節定海人未詳仕何官少好讀老子太玄經靖難後與郭良棄官同走出京城爲道士入山去

何洲

何洲海州人不知仕何官與宋和郭節友善素以忠義相勗靖難後遂相約棄官爲篋人客死異域竟莫識其姓名王詔合和節洲而系之贊曰箕子陳範嚴氏隱卜義有從否道有宜告烈烈英賢寥寥真鶴

郭良

郭良不知何許人靖難後與梁中節相約棄官爲道士去贊曰駕言導引嘯傲林臯頽波莫挽使我心勞

雪庵和尚

雪庵和尚名暨不知其姓靖難初方黃之獄殺幾萬人即不殺謫戍窮邊不死於道死於邊者又幾萬人當是時和尚壯年始慟哭落髮爲僧西南走重慶重慶大竹善慶里山水奇絕可廬和尚又走善慶里里墟中有隱士杜景賢知和尚非常人與之遊往來白龍諸山山旁有松栢灘灘水清駛蘿

望森蔚和尚欲寺焉景賢豪有力亟爲之寺寺成和尚率其徒數人入居之昕夕誦經山中人不知書謂且誦佛經乃不知其誦易乾卦也景賢曰和尚相釋而誦儒不可請誦佛經景賢意和尚不宜誦儒書恐有踪跡然又不肯顯言言則恐和尚走去以故婉解之乃和尚亦知景賢意遂棄儒經不誦誦觀音經寺因名觀音云和尚好觀楚詞時時買楚詞袖之登小舟急棹難中流朗讀一葉輒投一葉於水投已輒哭哭已又讀讀終卷乃已衆莫測其云何景賢固知之然亦不問和尚和尚好酒

不戒酒日注酒一壺俟客客至輒飲客不至即拉
樵牧豎入飲飲半酤呼兒童歌曰我歌爾和歌竟
瞑焉而寐和尚頎形秀爽指柔白剪剪落筆成章
詞不甚工密然意氣渙發又能感愴人或曰和尚
當建文壬午爲御史不數月帝遜位和尚固秘跡
以死死之日其徒問曰師即死宜銘何許人和尚
張目曰松陽問其姓名不答和尚有詩若干篇今
且百四十餘年尚未敢顯行於世或曰此松陽葉
希賢也以賢良方正舉爲監察御史

河西傭

河西傭不知何許人建文四年夏六月 成祖入
金陵即帝位傭被葛衣走是冬至金城行乞市中
金城邊地極寒傭常衣葛衣明年過河西依莊浪
豪魯家爲傭傭亦取直稍稍積買羊裘披之雖寒
必覆之故葛衣葛益破縷縷竟不肯脫故葛衣夏
或衣暑布布即新故葛衣輒覆其上人勸之棄故
葛衣不肯棄直悶悶不答傭錢稍有餘走市中買
牛肉酒與諸乞兒食飲傭力作倦時自吟哦或夜
聞其哭泣聲永樂中有留都官從宋總兵至莊浪
者識傭欲與語傭走南山中避旬月留都官去乃

還有問留都官傭何人者留都官亦不答在莊浪
數年病且死呼主人謝囑曰我死勿殮我棺幸西
北風大起火我無埋我骨魯家從其言

川中補鍋匠

川中補鍋匠亦不知何許人往來夔慶間爲人補
鍋至州邑不過三日即去去或復來夔慶人有欲
學補鍋者即教之補鍋不索謝錢直令負擔從有
後曹學者至即遣先學者去如是數年夔慶間人
識之皆呼爲老鍋匠補鍋或與錢布米不擇當食
時與之食即不復索錢錢稍稍積囊中遇風雨寒

暑不出補鍋即出錢買酒飯自飲食常寄宿蕭寺
中忽夔州市中逢馮翁者二人相顧愕然已而相
持哭哭已相牽入山岩中坐語竟日學補鍋者屏
不得聞二人語語已又相持哭且別去言今永訣
不可復相見已竟莫知其所終蜀中娥眉亭嘗有
建文遺臣題詩云一箇忠臣九族殃全身遠害亦
天常夷齊死後君臣薄力爲君王固首陽

馮翁

馮翁亦不知何許人在夔州以章句教童子給衣
食能爲對句及古詩詩輒自題馬二子或馬公或

塞馬先生嘗作詩大書壁間比見補鍋匠歸即剗
去詩曰夜夢何奇特龍飛天漢津朝橫滄海曲夕
過滇池濱光燁皆五色蜿蜒無損鱗淵田變化間
張王藉高旻時蓋永樂甲申乙酉間未幾辭主人
去莫知所終

東湖樵夫

東湖樵夫熱浙東臨海東湖上日負柴入市口不
二價建文壬午秋詔至臨海湖上人相率走縣庭
聽詔或歸語樵夫
皇帝登極樵夫愕然曰皇
帝安在或曰燒宮
矣樵夫慟哭遂投湖水中

死竟不知何許人

論曰余聞之陶徵士言齊二客魯兩生史並失其名操行之難而姓名翳然撫卷長嘆不能已已余獨幸夫雪庵諸君子忍垢茹荼卒晦其名以不滅其族也

建文遜國臣記第六卷終

子履準校正

建文遜國臣記第七卷

重編第五十八

海鹽鄭曉

戶部尚書王鈍

王鈍字士魯太康人故元進士爲猗氏尹洪武十年舉秀才授主客主事改長沙通判坐事免後舉明經授大名通判遷吏部郎中福建叅議陞叅政寬慎廉介民懷其惠坐轉漕不給當罷特宥召遣持節諭撫麓川平緬却贈金或曰夷且疑貳柰何鈍受之悉輸雲南省藏還陞浙江左布政使憂去建文初陞戶部尚書靖難兵至鈍踰城走靖難後

召見曰爾向輔建文間朕骨肉今何顏邪鈍頓首
懃謝命致仕月給尚書半俸永樂元年六月鈍上
言軍令屯種數事皆從之復命往北京山東撫綏
軍民經理屯戍二年四月仍浙江布政使與勅致
仕卒子噩官至戶部侍郎

工部尚書嚴震直

嚴震直烏程人洪武五年起家布衣授試衆議尋
授戶部郎中陞工部右侍郎逾年進尚書二十六
年鄉民訴其第姪不法上付震直訊報具獄
上以爲不欺赦其第姪已而坐事降監察御史使

龍州二十八年修桂林靈渠尋陞右都御史復爲
工部尚書洪武三十年二月震直上論兩廣鹽法
廣鹽得行江西安贛吉臨諸府震直質直勤敏
上數稱之時時賜食復其家靖難兵起震直督餉
齊魯間兵敗爲虜兵所縛置布囊兩馬來舁至北
平建文君遜位後復爲工部尚書奉使安南至雲
南見建文君悲愴吞金而死震直魁梧幼不喜讀
書力田供徭賦顧長於算數寡學識諸權貴人皆
喜之

侍郎學士王景

王景字景彰以字行松陽人洪武初起家懷遠教諭歷知州山西叅政謫雲南建文君召景爲知縣留與修高廟實錄母憂去服闋吏部尚書張統爲雲南布政使時知景薦陞禮部右侍郎兼翰林侍講克總裁官靖難後進學士時言建文君崩上問景葬禮景頓首言宜用天子禮上從之景博學能文章善書

侍郎學士董倫

董倫字安常恩縣人僑居宛平質直有文學遨遊山林間布褐藜藿淡如也從遊者衆稱貝川先生

勝國時累辟不起國初擢用甯縣儒士張寧寧薦
倫洪武十五年遣使徵爲右贊善事懿文太子陳
說忠厚十八年擢左春坊大學士太子卒出爲河
南左叅政留情民莫嘗上封事數千言又薦肇州
吏目諸葛伯衡上擢伯衡陝西右叅議三十年
詿譏免官典教滇南建文君在東宮憐其老且遠
去賜白金若干鎰至成都蜀獻王敬禮倫抵滇開
心訓化不忍鄙夷其人雖蠻童獍豎皆知向慕建
文君即位念舊臣屢詢倫左右亦多薦倫者召拜
禮部侍郎兼翰林學士賜御書怡老堂扁及棹几

王鳩杖各一倫上表謝略曰桓榮設几杖於太常
不聞宸翰之賜晏殊題舊學於神道未見几杖之
頒自今將杖以戒噎則當思四海或有飢餒之民
憑几以安身則當念一物或有顛連之嘆或曰此
孝孺代筆也初監察御史解縉嘗代夏長文作劾
都御史袁太書太恨縉中傷縉上今縉十年著述
來京擢用未及期上崩縉赴臨有司謂赴臨非
詔旨謫縉河州衛史縉與倫書祈援倫左右縉得
召還爲翰林待詔倫爲人質直敦厚富文學爲時
所重建文間屢懇言宜親睦宗人不聽靖難後倫

年八十餘今致仕出京悒悒成疾數日卒

大理少卿薛崑

薛崑閬中人慷慨負志操有治才口辯建文三年以鎮江知府爲大理左少卿是年方孝孺建議草詔令崑贊至北平又作宣諭數千言刊印千紙付崑令密散北兵諸將士崑見成祖曰上言殿下旦釋甲謁孝陵暮即旋師成祖叱曰事至此尚誰欺左右請殺崑成祖曰天子命使也釋之歸靖難後免崑死謫廣西永樂初安南王孫陳天平自老撾來歸李昇子蒼請天平歸還國上命

廣西總兵黃中以兵五千送天平歸中舉崑爲輔
行至芹站伏發刼殺天平崑被虜死

少卿學士高遜志

高遜志字士敏蕭縣人元末僑寓嘉興好問學嘗
侍父宦遊吳中受業宣城貢師大鄱陽周伯琦遂
昌鄭元佑爲文深純典雅成一家言年二十五爲
鄮山書院山長洪武二年徵修元史入翰林爲編
修累遷侍讀學士建文時太常右少卿兼學士庚
辰會試與董倫爲考試官所舉士胡靖吳溥楊子
榮楊溥胡濙董靖難後皆爲名臣遜志存沒不可

考是科同預較藝者右拾遺朱逢吉編修史官吳
勤葉惠仲趙友士徐旭張秉彝監試御史王度俞
士吉皆一時之選惟惠仲王度死難餘皆位如故
徐旭永樂初爲吏部郎中與逢吉皆預重修高
廟實錄旭陞國子祭酒士吉永樂初爲僉都御史

國子祭酒張顯宗

張顯宗字明遠汀州寧化人少喪父母黃守志訓
教顯宗以文學著名洪武二十四年進士及第二
十九年以編修陞太常寺丞賜衣一襲三十年署
國子祭酒事建文君即位爲真上便宜數事學政

一新壬午正月陞工部右侍郎靖兵至淮顯宗奉詔起義兵江西募民出粟給軍餉六月還復爲祭酒靖難後江西兵執顯宗及布政使楊璉按察使房安僉事呂昇至南京謫顯宗等戊興州後平交趾起顯宗爲左布政使勞來撫戢夷民安附永樂七年卒於官顯宗性行孝友政事敏達時以文學飾吏事會交趾初平人情未定清林知州王賦武寧知州魏思善能奉行顯宗約束皆有惠政並卒於官

待講學士王達

王達字達善無錫人洪武間爲大同訓導遷北平
私上謁成祖成祖喜禮達建文末薦陞國子教
職靖難後姚廣孝又薦達陞翰林編修再陞侍講
學士達謙和恭慎能詩文上嘗問達建文君事
對曰建文君亦可與爲善顧輔導非人耳上終
薄達一日達侍問達十難字達識其八上曰朕
更有難字難汝達懼服銀屑死上顧憐之命有
司歸其喪或曰達草靖難登極詔或曰草詔者括
蒼王景學士也

翰林侍讀唐愚士

唐愚士名之淳以字行山陰人建文二年勅翰林
侍從之臣方孝孺等集數千載經史中事爲一書
以考治亂爲鑒戒命舉優通文學之士孝孺首薦
愚士愚士時寓金陵爲李景隆子師立召爲翰林
侍讀賜冠帶令與孝孺俱領修書事進講前漢書
愚士少負奇志好學父肅仕國初應奉翰林文字
有文章名愚士得遊公卿間宋濂稱其文勉之進
學肅謫死臨濂愚士奉喪歸葬求父遺文雖荒邨
敗壁高崖斷石靡不纂錄什襲時時伏讀聲凄切
動人聞者掩涕愚士長身巨鼻博聞多識練達世

故爲文蔚贍尤長於詩翰洪武中數從景隆徧遊
燕薊秦周所過廢都舊邑名賢古帝遺跡輒爲詩
歌論記詞旨超絕性喜飲酒酒酣高談傾坐晚得
官近侍未幾病病愈復起明年病甚比卒遺言請
銘孝孺愚士貧無他宗族喪事數千百緡倚辦景
隆孝孺爲聞上詔有司給舟歸葬

翰林侍講樓璉

樓璉字士連金華人嘗從宋濂學洪武中以儒士
召歷宣寧仁壽主簿藍田知縣擢廣東道監察御
史謫戍雲南建文君嗣位屢下詔求賢璉以文學

舉入翰林侍經筵官至侍讀靖難兵入京 文皇
命方孝孺草詔孝孺哭且罵授之筆擲諸地曰身
可死詔不可草改命璉及王景璉惶懼不敢辭歸
而憤悶妻子問之曰得無傷方先生邪璉愧曰我
受刑猶可正恐累及爾輩耳遂巡一夕自經死

翰林侍書宋懌

宋懌字子夷金華人文憲公孫也懌父燧中書舍
人懌思紹父學奉母孝蜀獻王聞之時賜粟帛賜
其家專心力學書益工建文君即位念濂爲興宗
舊學之臣召懌入翰林爲侍書與劉彥欽朱思平

皆知名建文時而瀛門人有聲稱者同郡橫理清
陽鄭楷皆見擢用永樂十年瀛孫情坐鄭公智黨
刑部侍郎張本請罪情 文皇曰瀛名儒開國時
事 皇考有勞原情勿問

尚寶司丞李得成

李得成涑水人父德儀早卒母張氏洪武初避兵
溺死得成卧水求其尸塑父母像與妻事之甚謹
洪武十九年縣舉孝廉爲大官署丞二十四年改
太常贊禮郎二十五年又以割肝報效之忠陞尚
寶司丞二十七年八月旌其門孝子學士劉三吾

爲傳其事靖難兵起景隆敗於德州濟南被圍急
黃子澄等謀緩燕師遣人講和得成慷慨請行見
成祖濟南城下請回軍還燕成祖必欲得齊黃
乃肯解兵遣得成歸報朝廷以得成辱命下獄已
而宥之永樂初陞陝西左叅政歷陞陝西右布政
使數上言民間疾苦

監察御史尹昌隆

尹昌隆字彥謙太和人洪武十八年進士授翰林
修譔改監察御史建文即位初朝晏昌隆諫曰
太祖高皇帝鷄鳴而起昧爽而朝未嘗日出臨百

官百官于是乎戒懼故能庶績成舉天下安也陛下嗣守大業固宜追繩祖武兢兢業業憂勤萬幾未明求衣日旰忘食常如不及今乃溺于晏安日刻甚晏猶未臨朝群臣宿衛疲伺廢業上下懈弛臣恐播天下傳四夷非社稷福也建文君曰昌隆言中朕過禮部可頒示天下使人知朕過元年京師地震昌隆疏言奸人專政陰盛陽微謫見於天執政大怒斥爲福寧知縣未幾中使誣昌隆詛訛下獄事白得釋靖難兵南下昌隆上書言今日事勢日去而北來章奏言周公輔成王不若罷兵息

戰許其入朝彼旣欲申大義于天下不應便相違
戾設或有蹉便須讓位不失守藩若沉吟不斷禍
至無日進退失據雖欲求爲丹徒布衣不可得矣
不報靖難後昌隆名在奸黨驅出就戮昌隆當陛
大呼曰臣當時曾上章勸讓位陛下奏牘尚在可
覆也命緩昌隆刑檢奏有之上曰火燒頭早從
此言南北生靈受禍不若是酷朕亦無此勞苦遂
貸昌隆死未幾以爲北平按察知事行部主事預
儲議進左中允漢庶人惡昌隆改爲禮部主事尚
書呂震喜屬官諂忌昌隆誣昌隆與谷庶人通謀

論死沒其家震病時時號呼乞解曰尹相尹相妻
子問故曰昌隆守欲殺我震竟死

國子博士王紳子馨

王紳字仲縉文忠學士禕之子年十三穎敏過人
幼鞠於兄綬最恭順痛父死義尤孝事母母卒哀
毀未幾兄綬亦卒營塋苦卓負奇志博讀經史
百家言發諸論難縱橫磅礴沉思銳氣俯視朋流
朱濂一見奇紳曰華川有子洪武十五年蜀王禮
聘抗客禮教授蜀郡紳痛父遺骸未返丘隴白王
走雲南慟哭原野行求久之不能得即奠死所仰

天一號幾絕日夜悲哀滇人感愴稱王孝子紳因
述滇南勸哭記時雲南布政使張統重紳純孝爲
作吊王翰林文建文君即位以給事紳誠御史黃
凱薦召爲國子博士預修高皇實錄與方孝孺
友善嘗尊孝孺爲百代儒宗勸著書淑來學孝孺
不應紳意悟自是略文藝潛心道德建文元年四
月紳上言父死節狀且曰陛下方隆孝治而明詔
又有旌表節義之條正微臣得展情事之時先臣
志節獲伸之日也下翰林定議降制曰朕纂承洪
業大賚四方文武之臣勲庸勞烈著於天下者咸

思褒封寵錫以崇德報功况於守節秉義之臣命
書愍贈曷可忘哉故翰林待制王稔博學雄文顯
名當世久事皇祖夙夜在廷獻納論思數被嘉獎
修史擅三尺之譽蒞民兼四善之稱蘊才而弗克
大施卹命而遽先出使導滇民而歸化宣皇威以
懷柔豈期携貳以詭謀竟致忘身而殉義歷年滋
久卹典未遑暨嗣息之疏陳乃興懷而慨歎是用
職陞禁從謚錫美名循彛制以勸忠推茂恩而示
訓尚惟冥漠服此殊榮特贈翰林院學士奉議大
夫謚文節開國以來文臣有謚者寔自稔始時襄

義被拔擢而與時浮沉紳上書勸之曰執事方負
天下重望治否安危固係於進退去取之是非而
所任非其所長所職非其所事位高於器則有覆
餗之患才過於職則有積薪之譏非其才而強委
之至於僨事則是執事欲爲尋常無聞之人而不
可得况敢望其逸樂優游而與時俗上下乎義得
書極憾之建文二年卒年四十有一有繼志齋集
三十卷藏于家子稔字叔豐少有志行壯力問學
性至孝紳痛念父沒食不蕪味稔遵教子孫相承
數十年不變父母喪三年酒肉未嘗入口學問該

博士從遊日衆有青巖稿聖朝文纂金華賢達傳
續文章正宗卒年五十九門人私謚孝莊先生稔
初從學孝孺靖難後嘗欲與孝孺表姪鄭珣至聚
寶門外負其遺骸歸葬不可得坐逮繫獄 文皇
念稔忠特宥之且用稔稔辭疾讀書青岩山下將
終身焉稔與童景庸書言痛念遜志名蹟日就湮
沒欲執事與令兄商確搜輯其學行幽潛生卒始
末爲家傳行狀以傳同志有愛慕之心者自能默
識謹藏或可待時發揚於萬一孫遂輯方氏遺文
爲侯城集後百年始傳

按察僉事葉砥

葉砥字周道一字履道上虞人有學行洪武三年進士除定襄縣丞八年坐累謫涼州砥處之裕如日杜門力學時法峻諸謫士伍河西者喜從砥遊建文元年詔求賢陝西按察羅副使臨江知府劉鵬上虞知縣李惟中皆薦砥史才召爲翰林編修修國史或又薦砥才任風憲改廣西按察僉事永樂初坐修史書靖難事多微詞被逮籍其家惟薄田廬故書數篋事白仍與史事書成改考功郎中尋副總裁永樂大典侍講東宮郎中三考加俸二

等職如故砥重聽誤謂授他職上爲罵授砥砥不自安求去不許請郡得饒州知府年八十卒於官

知府劉有年

劉有年廬陵人徙沅州洪武中明經起家爲監察御史學行有聞辭官養母忤旨謫傳舟通州有年至通州讀書不解得儀經十八篇於州故家上之詔藏秘閣建文君起有年徙中爲太平知府靖難後坐不肯迎駕謫雲南西平侯知有年賢遣諸子從學且薦於朝及交趾平以爲按察僉事卒官黃福贊有年江湖曾次朱泗規模文宗韓柳學本程

朱

典史魏澤

魏澤字彥恩溧水人有學行洪武中累遷至刑部尚書先是 文皇南下姚廣孝曰殿下至京幸全方孝孺殺此人則天下讀書種子絕矣 文皇曰然比至京建文君遜去遂召孝孺問曰我法周公匡成王成王不在當議所立對曰殿下旣以匡王室而來成王不在當立成王之子忤旨因有滅十族等語遂械繫獄以廣孝言未殺孝孺且收捕其族黨每捕至輒下獄怵孝孺終不屈乃盡殺之澤

是時謫爲寧海典史當捕方氏悉力保護周旋以故方氏有遺育謝文肅公詩所謂孫枝一葉者澤之力也後過孝孺故居爲詩悲悼詩曰筍輿衝雨過侯城撫景令人感慨生黃鳥向人空百轉清猿墮淚只三聲山中自可全高節天下難居是盛名却憶令威千載後重歸華表不勝情

衛卒羅義

羅義山西清遠衛戍卒也靖難兵起義詣闕上書乞息兵講和又錄上文皇書言殿下聰明英武今之周公也宜謹守燕土以法周公輔成王之義

嘗聞夷齊以國相讓去隱首陽聖賢欲成天下之事必先明順逆之理成敗之勢禍福之機又得天道之宜人心之安然後可殿下今以藩國敵朝廷即遂其願尤爲不可况萬難無一易哉乞早息兵歸國書上下義獄建文四年六月庚辰 上出義獄中擢戶科給事中未幾陞湖廣左叅政

建文遜國臣記第八卷

五原編第五十九

海鹽鄭曉

都督平安

平安初名保兒滁州人太祖養保兒及周舍道舍馬兒金剛奴也先買驢真童潑兒爲義子分守新附城邑安父定從太祖起濠梁積功至濟寧指揮僉事又從常遇春定山東下河南克元都戰沒平襲陞密雲指揮使洪武三十一年擢右軍都督僉事靖難兵起克叅將從景隆而北設伏白溝河敗績營單家橋邀北餉舟疑不敢進景隆敗鐔

山安援景隆殺陳亨還與鐵鉉共守濟南已而朱
能兵至安敗之轉戰果昌告捷又戰單家橋執薛
祿祿逸去復戰陳暉不相援安遂敗藁城之役安
陷陣先登衆不繼三戰三敗進攻北平又戰敗援
保定不克建文四年進副總兵帥遼東兵復通州
不克退戰淝河靖難兵伏發夜敗安安轉戰小河
殺王真 成祖督戰甚急安挺鎗大呼馬蹶弗得
前王麒又奮刀入安陣逼安安遂退又戰靈壁安
及陳暉馬溥徐真皆被執安力舉數百斤果勇善
戰亨真皆驍將並爲安所殺安就執靖難諸將皆

喜或請殺安 成祖惜其才勇釋縛簡銳卒衛送之北平且令 仁宗郭資善視安已而掌北平都司事進北京行後府都督僉事永樂七年三月成祖見安忽問曰安乃尚無恙安慚懼遂自經今武安侯成山伯即亨真後也

都督甯忠

甯忠累官都督建文元年充征虜右副將軍與駙馬都尉李堅從大將軍至北平八月及靖難兵戰于真定敗奔滹沱河戰又敗與都督顧成都指揮劉遂皆被執忠之妻都督徐凱女也後與凱同死

都督潘忠

潘忠歷官至都督將兵屯雄縣建文元年八月靖
難兵至雄破其東門忠至月漾橋遇伏戰敗被執
都督袁宇

袁宇壽州人父洪開國功爲左都督宇事建文君
有軍功爲指揮使韓王妃及李景隆妻宇兄弟也
宇從景隆北進有功陞後府都督同知建文三年
六月壬午靖難將李遠出沛泗掠餉道宇率步騎
三萬邀遠中伏大敗宇脫身走以第容爲文皇
駙馬都尉封廣平侯故得不死建文四年七月宇

練兵雲南

都督楊松

楊松積功官至都督男果敢戰靖難兵起列營雄
鄭敵至輒敗與潘忠皆被執

都督馬溥

馬溥壽州人父鑑開國有功官至都督僉事溥襲
武德衛指揮僉事建文君初陞都督四年夏與徐
真並充叅將遇靖難兵戰敗靈璧皆被執溥子春
爲周府儀賓靖難後宥溥令改建周府

都督陳暉

陳睥始爲洮州衛指揮累功至都督克副總兵與靖難兵戰真保滄德間互有勝負已而戰敗被執送北平建文四年八月遣之江西叅贊總兵韓觀軍事觀開國功臣韓成子也

都指揮房昭

房昭都指揮守大同建文三年七月引兵入紫荆關掠保定登山結寨號召義勇承制授指揮千百戶進據易州西水寨寨在萬山中四面險峻惟一徑攀援可上昭守寨集兵糧進攻北平 文皇惡昭逼藩府急回軍渡滹沱河八月真定將官都指

韋諒率兵萬人運餉援昭 文皇曰昭得諒兵
糧卒未可破比至餉入寨遂進兵合圍真定裨將
都指揮花英鄭琦來援陣義眉山下合戰大敗英
琦及都指揮王恭詹忠等皆被執昭諒脫走西水
寨遂破永樂元年昭尚爲將官備禦宣府

都指揮唐禮

唐禮歷官都指揮靖難兵起盛將軍以徐凱敗於
滄州引兵出德州營於東昌禮素稱戰將令將騎
兵殿後而以孫霖爲先鋒營滑口靖難兵夜襲破
之擒禮霖遁走

都指揮孫狗皮

孫狗皮徐州人歷官北平都指揮建文中數從諸將力戰有功靖難兵畏之已而戰敗被執永樂元年坐死宥之降百戶

都指揮葛進

葛進歷官河南都指揮使克偏將從大將軍北進建文四年正月朔靖難兵至藁城時進爲先鋒率步騎萬人渡滹沱河半渡靖難將李遠擊之進見遠兵稍退繫馬林間步卒短兵接遠誘進潛師出進後盡解林間繫馬急鼓衆擊進進兵失馬大敗

脫身靖難後坐死宥之掌寧夏衛事

太監吳亮

吳亮者建文中中官最親幸建文君焚宮遜去
文皇疑匿于僧溥洽所永樂乙酉以他事禁錮溥
洽命胡給事中湊以訪張邁邁爲名又遣太監鄭
和等下西洋徧物色不可得正統七年有僧出自
田州土官所至廣西藩司自稱建文皇帝曰我自
蜀歷滇遊方至此今老矣欲送骸骨歸故鄉官司
奏上驛送赴京號爲老佛至京寓大興隆寺京城
內外僧拜謁無虛日皆曰此海外高僧科道官屢

上言恐其惑衆乃下獄朝廷不恣以亮經侍建文
君使審視老佛見亮即曰汝非吳亮耶亮曰不是
曰我昔御便殿食子鷺棄片肉於地汝時手執壺
狗飴之何謂不是亮伏地哭不能仰視復命畢自
經死遂取老佛入西內卒塋西山不封不樹鄞人
黃潤玉有學行爲廣西提學親見建文君跌坐蒲
堂曰我朱允炆也長身巨鼻聲如洪鍾

皇明天文述序

高皇久在兵間熟知軋象既登宸觀召集名家覽
搜往牒設官制象并合華夏曲算旁求綜覽
以故二統相持則愆諸七政三曆相讎必協於五
紀敬天勤民蓋孜孜焉矧其災祲一譴側身脩省
符瑞屢臻虛心式教雖堯欽曆象舜在璣衡不是
過矣若乃訓諭諸王飭戒羣將吉凶先見動中玄
機疇人世業莫能測識豈非數由天悟理本神乎
者耶 成祖 仁宗親承指授 列聖相傳憲章
具在凡以答天心之仁愛顧民情之暑險者要不

止於觀變明時撫辰熙績而已議者乃謂保章挈
壺名號徒存太史天官職業盡廢日月之交會氣
朔之盈虛中節之緩急晝夜之短長似多違舛稍
宜更定豈知位育叅贊之道燮理弼亮之功有不
假於器數藝術者歟述天文

嘉靖己酉六月望日鄭曉識

皇明天文述序終

皇明天文述

吾學編第六十

海鹽鄭曉

吳元年太史院使劉基率其屬高翼等上戊申大
統曆 上初在滁陽問韓國公漢有三傑佐平天
下今徐達可方韓信公可兼張良蕭何乎對曰良
智計絕人臣何敢望良若轉給餼或可勉效何耳
上因問今世之士孰可擬良者對曰臣聞浙東朱
濂能知象緯 上曰以吾所聞濂不如青田劉基
上定括蒼孫炎以 上命聘基詣金陵時時占乾
象佐行軍輒效以爲太史監太史令尋改太史院

使洪武元年改院爲司天監又置回回司天監是
年十一月徵元太史院使張佑張沂司農卿兼太
史院使成諱太史同知郭讓朱茂司天少監王可
大石澤李義太監趙恂太史院監候劉孝忠靈臺
郎張容回回司天監黑的兒阿都刺司天監永迭
里月實一十四人二年又徵元回回曆官鄭阿里
等十一人至京議曆法占天象三年定爲欽天監
掌察天文定曆數凡日月星辰風雨氣色之變率
其屬而占候焉語在百官考十年三月 上與羣
臣論天與日月五星之行翰林應奉傅藻與籍黃

麟考功監丞郭傳皆以蔡氏右旋之說對 上曰
夫左旋日月五星皆右旋二十八宿經也附天體
而不動日月五星緯乎天者也朕自起兵以來與
善推步者仰觀天象二十有三年矣嘗於天氣清
爽之夜指一宿爲主太陰居是宿之西相去丈許
盡一夜則太陰漸過而東矣由此觀之則是右旋
此曆家亦嘗論之蔡氏謂爲左旋此則儒家之說
爾等不折而論之豈所謂格物致知之學乎十三
年秋 上坐武英西廡召見諸儒龔敎等言志
上說曰老儒質直宜輔朕始置四輔官告太廟以

王本杜佑龔敦爲春官杜敦趙民望吳源爲夏官
秋冬官缺令本等兼攝各司時令以熒陰陽十七
年七月製觀星盤十月大明清類天文分野書成
凡二十四卷詔賜秦晉 成祖周楚齊六府大抵
欽天監十二分野分配州郡與唐天文志稍異貞
觀中淳風撰法象志因漢書十二次度數始以唐
之州縣配而一行以爲天下山河之象存乎兩戒
北戒自三危積石負終南地絡之陰東及太華逾
河並雷首底柱王屋太行北抵常山之右乃東循
塞垣至穢貊朝鮮是謂北紀以限戎狄南戒自岷

山嶠冢負地絡之陽東及太華連商山熊耳外方
桐柏自上洛南逾江漢攜武當荆山至于衡陽乃
東循嶺徼達東甌閩中是謂南紀以限蠻夷故星
傳謂北戒爲胡門南戒爲越門河源自北紀之首
循雍州北徼達華陰而與地絡相會並行而東至
太行之曲分而東流與涇渭濟瀆相爲表裏謂之
北河江源自南紀之首循梁州南徼達華陽而與
地絡相會並行而東及荆山之陽分而東流漢水
淮瀆相爲表裏謂之南河故於天象則弘農分陝
爲兩河之會五服諸侯在焉自陝而西爲秦涼北

紀山河之曲爲晉代南紀山河之曲爲巴蜀皆負險用武之國也自陝而東三川中嶽爲成周西距外方大伾北至于濟南至于淮東達鉅野爲宋鄭陳蔡河內及濟水之陽爲鄆衛漢東濱淮水之陰爲申隨皆四戰用文之國也北紀之東至北河之北爲邢趙南紀之東至南河之南爲荆楚自北河下流南距岱山爲三齊夾右碣石爲北燕自南河下流北距岱山爲鄒魯南涉江淮爲吳越皆負海之國貨殖之所阜也自河源循塞垣北東及海爲戎狄自江源循嶺徼南東及海爲蠻越觀兩河之

象與雲漢之所始終而分野可知矣於易五月一
陰生而雲漢潛萌于天稷之下進及井鉞間得坤
維之氣陰始達於地上而雲漢上升始交於列宿
七緯之氣通矣東井據百川上流故鶉首爲秦蜀
墟得兩戒山河之首雲漢達坤維右而漸升始居
列宿上觜觿參伐皆直天關表而在河陰故實沉
下流得大梁距河稍遠涉陰亦深故其分野自漳
濱郤負恒山居北紀衆山之東南外接髦頭地皆
河外陰國也十月陰氣進踰軋維始上達于天雲
漢至營室東壁間升氣悉究與內規相接故自南

正達于西正得雲漢汁氣爲山河上流自北正達于東正得雲漢降氣爲山河下流陬訾在雲漢升降中居水行正位故其分野當中州河濟間且王良閤道由紫垣絕漢抵營室上帝離宮也內接成周皆豕韋分十一月一陽生而雲漢漸降退及艮維始下接于地至斗建間始復與列舍氣通於易天地始交泰象也踰析木津陰氣益降進及大辰升陽之氣究而雲漢沉潛於東正之中故易雷出地曰豫龍出泉爲解皆房心象也星紀得雲漢下流百川歸焉析木爲雲漢末派山河極焉故其分

野自南河下流窮南紀之曲東南負海爲星紀自
北河末派窮北紀之曲東北負海爲析木負海者
以其雲漢之陰也唯陬訾內接紫宮在王畿河濟
間降婁玄枵與山河首尾相遠隣顓頊之墟故爲
中州負海之國也其地當南河之北北河之南界
以岱宗至于東海自鶉首踰河戒東曰鶉火得重
離正位軒轅之杪在焉其分野自河會之交東接
祝融之墟北負河南及漢蓋寒燠之所均也自析
木紀天漢而南曰大火得明堂升氣天市之都在
焉其分野自鉅野岱宗西至陳畱北負河濟南及

淮皆和氣之所布也陽氣自明堂漸升遠於龍角
曰壽星龍角謂之天關於易氣以陽決陰夫象也
升陽進踰天關得純乾之位故鶉尾直建巳之月
內列太微爲天庭其分野自南河以負海亦純陽
地也壽星在天關內故其分野在商亳西南淮水
之陰北連太室之東自陽盛之際亦異維地也夫
雲漢自坤抵艮爲地紀北斗自乾攜巽爲天綱其
分野與帝車相直皆五帝墟也究咸池之政而在
乾維內者降婁也故爲少昊之墟叶北宮之政而
在乾維外者臨訾也故爲顓頊之墟成攝提之政

而在巽維內者壽星也故爲太昊之墟布太微之
政而在巽維外者鶉尾也故爲烈山氏之墟得四
海中承太階之政者軒轅也故爲有熊氏之墟木
金得天地之微氣其神治于季月水火得天地之
章氣其神治于孟月故章道存乎至微道存乎終
皆陰陽變化之際也若微者沉潛而不及章者高
明而過亢皆非上帝之居也斗杓之外廷陽精之
所布也斗魁謂之會府陽精之所復也杓以治外
故鶉尾爲南方負海之國魁以治內故陬訾爲中
州四戰之國其餘列舍在雲漢之陰者八爲負海

之國在雲漢之陽者四爲四戰之國降婁玄枵以
負東海其神主於岱宗歲星位焉星紀鶉尾以負
南海其神主於衡山熒惑位焉鶉首實沉以負西
海其神主於華山太白位焉大梁析木以負北海
其神主於恒山辰星位焉鶉火大火壽星豕韋爲
中州其神主於嵩嶽鎮星位焉近代諸儒言星土
者或以州或以國虞夏秦漢郡國廢置不同周之
興也王畿千里及其衰也僅得河南七縣今天下
一統而直以鶉火爲周分則疆場外矣七國之初
天下地形雌韓而雄魏魏地西距高陵盡河東河

內北固漳鄴東分梁宋至於汝南韓據全鄭之地
南盡潁川南陽西達虢略距函谷固宜陽北連上
地皆綿亘數州相錯如繡考雲漢山河之象多者
或至十餘宿其後魏徙大梁則西河合於東井秦
拔宜陽而上黨入於輿鬼方戰國未滅時星家之
言屢有明效今則同在畿甸之中矣而或者猶據
漢書地理志推之是守甘石遺術而不知變通之
數也又古之辰次與節氣相係各據當時曆數與
歲差遷徙不同今更以七宿之中分四象中位自
上元之首以度數紀之而著其分野其州縣雖改

隸不同但據山河以分爾晉天文志十二次分野
始角亢者以東方蒼龍爲首也唐十二次始女虛
危者以十二支子爲首也其以斗牛爲星分之首
者日月星起於斗宿古之言天者由斗牛以紀星
故曰星紀則星紀爲十二次之首而斗牛又二十
八舍之首也本朝應運肇基而南京應天府寔星
紀斗牛之分且與天地人三統之正相協自周以
來數千年間帝王之運適符於今豈偶然哉是年
欽天監博士元統言曆日之法其來尚矣今曆雖
以大統爲名而積分猶授時曆數况授時曆法以

至元辛巳爲歷元至洪武甲子積一百四年以曆
法推之得三億七千六百一十九萬九千七百七
十五分經云大約七十年而差一度每歲差一分
五十抄辛巳至今年遠數盈漸差天度擬合修改
蓋七政之源有遲疾逆順伏見不齊其理深奧實
難推演聞磨勘司令王道亨有師郭伯玉者精明
九數之學若得此人推大統曆法庶幾可成一代
之制蓋天道無端惟數可以推其機天道至妙因
數可以明其理是理因數顯數從理出故理數可
相倚而不可相違也 上是其言十八年冬築欽

天監觀星臺於鷄鳴山回回欽天監觀星臺因花
雨臺二十年選疇人年壯解書者赴京習天文推
步之術二十九年鑄渾天儀成二十六年欽天監
監副李德芳言故元至元辛巳爲曆元上推往古
每百年長一日每百年消一日永久不可易也今
監正元統改作洪武甲子曆元不用消長之法考
得春秋晉獻公十五年戊寅歲距至元辛巳二千
一百六十三年以辛巳爲曆元推得天正冬至在
甲寅日夜子初三刻與當時實測數相合洪武甲
子元正上距獻公戊寅歲二千二百六十一年推

得天正冬至在巳未日午正三刻比辛巳爲元差四日六時五刻當用至元辛巳爲元及消長之法方合天道疏奏元統復言臣所推甲子曆元實與舊法相合略無差繆 上曰二統皆難憑只驗七

政交會行度無差者爲是自是欽天監造曆以洪武甲子爲曆元仍依舊法推算不用捷法二十七年召國子博士錢宰等脩書傳 上曰若輩知天

象乎皆對不知 上曰朕觀天象自洪武初有黑氣凝奎壁乃文章之府朕甚異焉今年春暮黑氣始消文運興矣洪武中朝廷訪求通曉曆數數往

知來試無不驗者封侯食祿千五百石山東監生
周敬心奏言國祚長短在德厚薄非曆數之可定
三代有道之長固有定論三代而下深仁厚德者
漢唐宋而已如漢高之寬仁繼以文景之恭儉昭
宣之賢明光武之中興章帝之長者唐太宗之力
行仁義宋太宗之誠心愛民是以有道之長國祚
最短者莫如秦其次如隋又其次如五代始皇之
酷虐煬帝之苛暴五代之窮蹙是皆人事所致豈
在曆數欽惟 聖上應天眷命掃滅胡夷救亂誅
暴其功大矣然神武過於漢高而寬仁不及賢明

過於太宗而忠厚不及是以御宇以來政教未敷
四方未治伏乞效漢高之寬仁同太宗之忠厚法
三代之稅歛則帝王之祚可傳萬世又何必問諸
小技之人邪三十一年革回回監 仁宗即位作
臺禁中 上時時登臺觀象洪熙元年正月賜大
臣天元玉曆賦 太祖精於天文每以指訓子孫
以故 成祖 仁宗皆知天象凡遣將行師諸王
出塞遇有禳祥手勅緘諭 仁宗嘗見星變對大
臣泣下未幾晏駕正統四年造渾天璿璣玉衡簡
儀十一年令簡儀九道圭表壺漏並准南京作畧

影堂以便窺測調品十四年大統曆冬夏二至晝
夜六十一刻景泰六年造簡儀銅壺成化十年冬
鄱陽童軒知天文以太常少卿掌欽天監事弘治
十一年訪世業疇人并諸能通曆象遁甲卜筮者
正德元年七月五官監候楊源上疏言占候得大
角及心宿中星動搖天璇天機天權星不明乞安
居深宮絕遠遊獵罷弓馬嚴號令毋輕出入闕除
內侍寵倖遊逸小人節賞賜止工役親元老大臣
日侍講習詩書疏下禮部言源占候之言深切時
弊源復疏言十月二十六日占候得連日霾霧交

作爲衆邪之氣陰冒於陽臣欺于君小人擅權爲
下叛上引譬甚力劉瑾怒矯旨杖源三十釋之源
又疏言自正德二年來一向占候得火星入太微
垣帝座之前或東或西往來不一勸上宜思患
預防瑾大怒罵源爾何官亦學爲忠臣復矯旨痛
杖三十謫戍肅州行至懷慶卒十三年夏五月己
亥朔日食起復弗合日官周濂請驗交食以更曆
元禮部員外郎鄭繼之上言曰歲差之法虞喜以
五十年差一度久而驗之弗合也何承天以百年劉
焯以七十五年僧一行以八十三年久而驗之又

弗合也許衡王恂郭敬以六十六年有餘以密矣
今據其法步之又弗合也且如定歲之法積四基
餘日而分日加於四基故二至之時祇存絲忽此
所宜定也又如定日之法日有百刻而變爲九百
四十畫以氣朔有不盡之數難分故也凡月三十
日而二氣盈四百十一畫二十五秒一朔虛四百
四十一畫積盈虛之數以成閏故定朔必視四百
四十一畫前後爲朧朧祇在一畫之間此又所宜
定也日月交食唯日食實難定月食分數惟以距
交遠近別無四時增損蓋月小閏虛大月入閏虛

而實故八方所見同也日爲月所掩而食蓋日六
而月小日上而月下日遠而月近日異四時月有
九道故旁觀者遠近自不同矣如北方食旣南才
半虧南方食旣北才半虧故食之時刻分秒據地
定表因時求合而後準也如乾清宮火之歲仲秋
日食日官所步合八分六十七秒而閩廣之區遂
至食旣其時刻分秒焉可同之今按交食以更歷
元時分刻刻分分分秒至精至細及至於半秒
難分之所此又所宜定也夫差之半秒積以歲月
則躔離朧朧皆不合原算矣是年十月明年九月

十月望月三食時刻分秒並不協嘉靖三年正月
五星聚營室欽天監掌監事光祿少卿樂護上疏
曰臣等預算今年正月五星以次聚營室但太陽
臨近當隱伏不見今候其象果然夫數不爽而象
暗聚則其降精流氣亦必成祥自古五星之聚莫
不有大禍惟視人君德政淑慝何如耳占書曰五
星之聚是謂改易王者有德受慶子孫蕃昌無德
受殃失其國家百姓流亡蓋天道無親福無常主
故五星之聚有福有禍無德靡不受禍聚房周祚
以昌聚箕齊桓用霸漢興聚井宋盛聚奎是四者

皆當更革之際一福一禍培栽獲傾昭然在德惟
天寶聚于尾箕而唐德弗稱旋有祿山之亂唐業
遂衰 皇上聖德中興五星適聚可不益修聖德
愛養黎元以承此大慶乎簡易寡慾修德之大儉
用省財愛民之實伏乞 陛下鑒此天數之大克
已約躬勵精而實行之使人心悅而天意孚真所
謂有德受慶矣臣職司占候竊惟禍福之祥莫大
於此至於修德應天之實非臣等之言所能盡意
更乞延訪文武羣臣博求修德愛民之道而實行
之以及内外左右莫不修省協贊承此大慶不使

天眷別有所顧則宗社生靈不勝幸甚占書又曰
天下兵謀則五星聚於營室凡所以內修外攘以
銷夷狄盜賊之謀者似亦不可不加之意也伏乞
皇上亟與大臣圖之疏下禮部部言堯舜授受曰
曆數在躬允執厥中四海困窮天祿永終 皇上
起自潛邸入承大統正德年間權姦用事冗濫靡
費蠹耗無餘天下之財盡歸權室公私赤立國非
其國 皇上起而救之生理未復重以水旱非常
之災流移轉徙餓莩相壘朝廷屢議賑恤而在官
無可發之廩在民無可貸之儲相顧錯愕計無所

出所謂四海困窮者積漸至此遺大投艱付託甚重亨屯拯溺求望甚切伏望仰稽乾象俯順時宜圖任老成斥遠羣小崇敬畏戒逸欲嚴諸一心自足以爲祈天永命之本其他齋醮祈禳異端小說不宜輕信以啓倖門傷治體至於足國裕民則今日之務莫急於此必先儉約必端好尚必慎差遺必重爵賞必戒興作稍在得已即賜停止務求安靜休養生息假以數年天與之時人盡其力則生理庶可復而國用亦自有餘矣臣等待罪禮官星家之說素所未習不敢旁引曲證以瀆天聽至於

惠迪吉從逆凶作善降祥作惡降殃天命靡常常
於有德永言配命自求多福則歷聖言之若出一
口傳曰畏聖人之言伏乞垂情經典堯舜爲師執
一中以臨照百官賚四海以永綏天祿應天之實
莫大於此其欲修攘以銷盜賊夷狄之謀者候命
移咨兵部上議仍乞勅令百官同加寅畏勉修職
業凡事有關國體民生至計者並許直言以共成
嘉靖之治宗社幸甚生民幸甚時又有華湘亦以
光祿少卿管欽天監事上言自昔聖王承天御極
必以治曆明時爲先乾坤奠位之後四時七政隨

天而運寒暑代謝爲歲虧盈互易爲月晝夜還時
爲日經緯錯列爲星辰步算周審爲曆數天子奉
順陰陽時以作事事以厚生而世治時苟不明晦
朔弦望失其節分至啓閉乖其期則無以談治生
靈而世亂矣夫曆之來由黃帝訖秦末凡六改由
漢高祖訖漢末凡五改由魏文帝訖隋末凡十三
改由唐高祖訖周末凡十六改由宋太祖訖宋末
凡十八改由金熙宗而訖元末凡三改一曆之改
廣集衆見思無遺智法無遺術宜其永久不變然
歷代長於曆者不數歲而輒差杜預曰陰陽之運

隨動而差差而不已遂與曆錯歐陽修曰事在天
下其易差者莫如曆夫所以差者由天周有餘日
周不足也天周有餘則天常平運而舒日周不足
則日常內轉而縮天日之差於中星驗焉堯之冬
至初昏卯中而日在虛七度虛者北方之宿則日
行北陸纏於玄枵之子也今之冬至初昏室中而
在箕三度箕者東方之宿則日行東陸纏於析木
之寅也計今去堯未四千年而差五十度矣再以
赤道考之勝國至元辛巳改曆天正冬至赤道歲
差一度五十秒今退天三度五十二分五十秒也

黃道歲差九十二分九十八秒今退天三度二十五分七十四秒也故洪武中漏刻博士元統上言我朝承運以來曆雖以大統爲名而積分猶授時之數年遠數盈漸差天度距元辛巳至元統上言時歲在洪武甲子僅一百四十年迄今則二百四十二年授時曆法每歲差一分五十秒約七十年差一度今合差三度餘矣年逾遠而數逾盈然則治曆者豈不可隨時修改以求合於天哉夫不隨時修改求合於天則曆必差是以正德戊寅日食庚辰月食時刻分秒起復方位多與欽天監推等

不合山東道御史朱節謬薦臣知曆學改官於茲
恭惟 皇上入繼大統之年適與元之革命改憲
辛巳之歲相符則調元正曆以來未立之差法固
有待於今日臣切念班固作漢志以明治曆不可
不擇者三專門之裔明經之儒精筭之士臣於三
者無一焉蚤夜憂遑同知所措然於治曆之法聞
其槩矣古今善治曆者三家一曰漢大初曆以鍾
律起二曰唐大衍曆以著策起三曰元授時曆以
晷影測就日體測之毫忽微眇不可得而述者元
史所謂自古及今推驗之精蓋未有出於此顧豈

誣哉今欲正曆而不登臺測影臣竊以爲皆空言臆見也伏望令臣暫住朝來督率曾奏改曆中官正周濂及於疇人子弟中掄選諳曉本業善於書筭者及今冬至之前親詣觀象臺晝夜推測日影赤道黃道中星分秒日計月書至來年冬至以驗二十四氣二至二分日月交食合朔弦望日躔月離黃赤二道及昏旦中星七政躔度紫氣月孛羅候計都之類視元辛巳所求委有所差脩錄上覽乞勅禮部延訪四方有能知曆理如楊雄善立差法如邵雍沉潛智巧如許衡郭守敬者令其詳定

歲差以成一代之懿制夫天文七曜三垣二十八宿爲大聖人觀天文以察時變觀此也此其有恒之象也雲雨震電風雪霜露類皆天象而非其恒也彗孛虹珥之類其怪也夫日大明陽之精光居象也月夜明陰之精光也后象也上有失德則適見于天而薄食日食陽不勝陰也月食陰不讓陽也先王謹天戒莫嚴于日食矣春秋二百四十二年而日食三十六日官失之也史官失之也日輪大月較小日道近天在上月道近人在下故日食旣時四面有光溢出也水火金木土即人間日用

五府之精光也水行最速一瀉千里金行於世其
流如泉火三月而改木一歲而彫土博厚不遷故
金水附日歲一周天火二歲木十二歲土二十八
歲一周天土亦名填讀如鎮以填靜爲體讀如田
以填塞爲用也木星八十三年而與日合者七十
六火七十九年而與日合者三十七

土五十九年而與日合者五
十七金水雖隨日然金八年而合於日者五水四
十六年而合於日者一百四十五三垣曰天市明
堂位也曰太微朝廷位也曰紫微宮寢位也明堂

位者天子巡狩之居也朝廷位者聽政之居也宮
寢位者燕息之居也天市歲臨之太微日臨之紫
微朝夕在焉七曜必遵黃道歷天街歲一受事太
微而出猶大臣受天子之命於朝以行其職也二
十八宿分列四方各守其野率諸經星以共紫微
之帝猶郡國百司各治其職安其民人以承天子
也二十八宿者蒼龍白虎朱雀玄武各七宿也角
主發育萬物亢曰䟽廟氏爲天根房天子之後寢
鍵閉鈎鈐兩咸以防淫而謹內也心天子象言天
地之心人之主也尾主后妃敘御于上所箕承帚

婦又揚穀之器尾而受之以箕示婦道也五星聚箕尾而有天寶之亂亂自色荒也斗主薦賢受祿斗爲器量所以斟酌也民事莫重於耕織故牛女相聯牛農丈人耕具驪珠女獻工也天田九星象井田狗天鷄教樹畜也羅堰九坎天淵言農桑者先水利也北陰也故虛與危主死喪危禍事室以農畢而見故主管建宮室事嘉靖甲申五星聚營室矣壁圖書之秘府奎天子武庫婁主蕃牧犧牲以供祀事自室以至于婁天子之宮館苑囿在焉胃儲藏五穀之府昂主刑獄又名旄頭占胡人順

逆畢主邊兵鼎界之間有天街分華夷也參中三星中軍其中大將旁參謀也二肩左右將軍二足前後將軍觜行軍之藏府井主水泉主水衡法令平中之事物之平者莫如水故營國制城畫堦分州皆取象焉鬼主內外祠祀事柳主草木又爲天厨主饗燕事星爲文明之會主衣裳文綉張主珍寶宗廟服用翼天子之樂府也軫主車騎任載又是星插星隕大異也凌犯守畱芒角掩各以類占之若乃日之行道周天如循環月亦然兩環兩交一謂之天首一謂之大尾天尾爲計天首爲羅月行

遲速有常度最遲之處卽孛也故謂之月孛孛六十二年而七周天炁生於閏二十八年十閏而炁行一周天炁孛皆有度數無光象故與羅計同謂之四餘并七政爲十一也

洪武元年三月辛卯彗星出昴北二年五月甲午朔四年九月庚戌朔七年二月丁酉朔八年七月己未朔日食九年六月戊子客星見七月癸丑朔日食乙亥客星没十年二月白虹貫日十二月乙巳朔日食白虹貫日十一年九月客星掃天并十二月乙巳朔十四年十月壬子朔日食十一月黑

氣豆天十五年正月白虹貫日二月彗星見十六
年正月白虹貫日八月壬申朔日食十八年二月
乙巳初昏五星並見九月戊寅太白經天客星入
太微垣乙酉彗長丈掃翼十月彗星掃天廟十九
年三月白虹貫日四月熒惑留南斗七月癸亥三
辰晝見十二月癸未朔日食二十年二月五星皆
見五月丁丑三辰晝見六月太白經天秋二十一
年五月甲戌朔二十二年九月丙寅朔日食十二
月白虹貫日二十三年正月熒惑入南斗九月庚
寅朔二十四年三月戊子朔日食四月彗星三入

紫微垣二十六年四月太白經天七月甲辰朔日
食二十九年五星數失度三十年二月白虹亘天
貫日五月壬子朔日食十月熒惑犯南斗

建文二年三月丙寅朔日食

永樂元年四月太白出鼎址四年六月己未朔五
年十月辛巳朔六年四月己卯朔十月乙亥朔十
一年正月辛巳朔十二年正月丙子朔六月丙寅
朔十一月甲午朔十四年五月壬辰朔十五年四
月丁巳朔十月癸未朔十八年八月丁酉朔十九
年八月辛卯朔二十年正月己未朔二十一年六

月庚戌朔日食

洪熙元年四月有星變十月丙寅朔日食

宣德五年八月己巳朔日食十月夜有蓬星八日
始滅十二月有異星見或曰含譽星也六年四月
彗出東井九月熒惑犯南斗七年正月辛酉朔日
食八年八月熒惑犯南斗閏八月彗出天倉旁入
貫索掃七公是月有怪星見或曰歸邪星也

正統元年九月白虹貫日修狼星動搖四年八月
丙子朔五年正月甲辰朔六年正月己亥朔七月
丙申朔七年六月庚寅朔八年六月甲申朔十一

月壬子朔九年十月丙午朔十年四月朔十

一年四月朔十二年八月朔日食十三

年二月朔日食

景泰元年正月壬午彗星出天市垣掃天紀二年

六月朔日食三年三月甲午有星孛於畢八

月熒惑晝見十一月己未朔日食癸未客星見輿

鬼四年五月乙丑有星出鈎陳址二小星隨之丁

丑歲星晝見六月甲辰歲星晝見五年四月

朔六年四月朔日食

天順二年二月朔七年五月朔日食成

化二年太白曳入南斗三年二月丁酉朔日食既
四年二月壬辰朔日食七月有星孛於台斗五年
六月癸丑朔六年六月戊申朔日食七年春有星
孛于天田八年春彗星見軒轅九年三月山東諸
路黑氣亘天晝晦四月辛酉朔十年九月癸丑朔
十二年二月乙亥朔日食十三年正月山陰雨血
射人六月甲辰京師雨錢十八年五月己巳朔日
食二十年元日星變九月乙酉朔日食二十三年
五月星隕

弘治元年六月癸巳朔二年十二月甲申朔日食

三年十二月辛亥彗星見于天津七年三月己卯朔日食五月宣府山西河南白晝隕星八年三月乙酉朔十三年五月甲寅朔日食是年彗星見十五年五月庚午朔九月庚午朔日食十一月戊子雲南晝夜黑九日十八年九月庚子恒星晝見

正德元年三月隕星大如月六月辛酉震郊壇門七月己丑彗星見于參井入北斗至於戊戌乃滅太白經天白虹貫日八月大角大火中星動揺天璇天機天權星晦二年正月乙亥朔九年八月辛卯朔十年十二月癸丑朔十二年六月己巳朔十

皇明天文志

卷一

三年五月己亥朔十五年三月癸丑朔日食十六
年正月有星孛于東南填之橫絕東西復爲鉤屈
二月長安大雷電以風雨白毛三月癸丑朔日食
嘉靖三年正月五星聚于營室四年十二月乙卯
朔日食五年五月丁丑朔六年五月丁丑朔日食
六月甲子京師雨錢七月壬辰南京雨血七年五
月辛未朔八年十月癸亥朔日食十年六月乙巳
彗星見東井十一年春彗星再見八月彗星見東
星十二年六月彗星見昴畢射天潢十月辛巳星
隕如雨十八年四月庚申彗星見兩旬始滅六月

丁酉震奉先殿閏七月庚申木火水金星聚東井
十九年三月癸巳朔日食九月壬子熒惑入南斗
十月水土金星聚于角十二月戊午太白經天二
十一年七月己酉朔日食八月丁酉熒惑掩南斗
杓二十二年正月丙午朔日食二十三年六月熒
惑犯南斗二十四年五月壬戌朔日食二十六年
木星逆行留營室二十七年三月朔日食望月食
二十八年三月辛未朔日食

皇明天文述終

子履準校正